



ATASSUT  
Postboks 399  
3900 Nuuk  
+299323366  
Fax: +299325840  
[Atassut@greenet.gl](mailto:Atassut@greenet.gl)  
[www.atassut.gl](http://www.atassut.gl)

Nuuk/Qaqortoq 18. marts 2010

Naalakkersuisunut allakkat ammasut:

**Arctic Umiaq Line A/S ingerlaqqissinnaajunnaarnissamik navianartorsiorneranit aniguisinneqarli**

Kukkuneruvoq Kalaallit Nunaat ataasiinnarmik tunngavilimmik angallannikkut ataqatigiissassallugu, nunarpummi imarsuarmik unguneqaqqavoq, taamaammat inuiaqatigiit kalaallit imaatigut angalasinnaanissamut periarfissaqartuarnissaat qulakkeersimaneqartariaqarpoq, tamannaluunniit inuiaqatigiit akilertariaqassagaluarpasuk.

AUL A/S namminersortunngorsarneqalermat ATASSUT-mit tamaviaarpugut Inatsisartut naaggaaqqullugit, nalunnginnatsigu namminersortunngorsaaneq umiarsuaatileqatigiiffimmut kingunerlorujussuassasoq. Aarleqqutigisagullumi tamarmik ilumoorluinnartuusimasut ullumikkut uppersarneqartuarpoq.

Namminersortunngorsaaneq iluatsinngitsoormat Royal Arctic Line A/S aamma Air Greenland A/S suleqatigiillutik annaassiniaraluarnerat iluatsinngitsoortoq ullumikkut aamma uppersarneqarpoq ajoraluartumillu AUL-ip killiffigaa ingerlaqqissinnaajunnaarnissamik navianartorsiorneq.

Tamanna tunngavigalugu ATASSUT-mit Naalakkersuisunut ilungersortumik matumuuna saaffiginnippugut immikkut ittumik iliuuseqartoqarnissaa aqutissiuuteqqullugu qulakkeeqqullugulu innuttaasut nunatsinni isorartoqisumiittut imaatigut angallanneqarnissamut periarfissaat innarlerneqassanngitsoq.

ATASSUT-mit siunnersuutigissavarput marloqiusanik iliuuseqartoqassasoq:

Siullermik: 2010-mut aningaasaliissutaasimasut amigarmata ilassutitut aningaasaliissutit aqutigalugit AUL-ip ingerlaannarnissaa qulakkeerniarlugu Aningaasaqarnermut Ataatsimiititaliamut Naalakkersuisut qinnuteqaateqassasut.

Aappassaanik: Air Greenland A/S-ip piginneqataassutini tuniniassallugit pilersaarutini pimoorussimassappagu piginneqataassutit Namminersorlutik Oqartussanit pisiarineqassasut Royal Arctic Line A/S-imullu ingerlatassannorlugit tunniunneqarnissaat sulissutigineqassasoq.

ATASSUT-mit nalunngilarput Naalakkersuisut angallanneq pillugu isumalioqatigiissitaq utaqqiumagaat, kisianni AUL-imut tunngasoq aaqinniassallugu ukiup qiteqqunnissaata tungaanut utaqqissunneqarsinnaanngilaq pisorlu immikkorluinnaq ittuummat Naalakkersuisut ilungersortumik ATASSUT-mit qinnuigissavagut maannangaaq timitalimmik iliuuseqaqqullugit, uagut piareersimavugut immikkut ittumik aningaasaliisoqarnissaanik qinnuteqaateqartoqassappat tamanna akuersaassallugu.

Saaffiginnissuterput Naalakkersuisunit tigulluarneqassasoq neriulluta

Inussiarnersumillu inuulluaqqusilluta

ATASSUT sinnerlugu

Gerhardt Petersen  
Siulittaasoq

Finn Karlsen  
Gruppemi siulittaasoq